



www.khanty-yasang.ru

Общественно-политическая газета

E-mail: luima@ugracom.ru

ЛУИМА СЭРИПОС

24 мая
2013 года
№10
(1052)

Основана 11 февраля 1989 года

Няврамыт ёмщакв вос ўщлахтэгыт



Г. Кондина поблудум хури

Ты
номерыт
ЛОВИНЫТЭН:

Мот хон
маныл
ёхталам
муй нэ

2

Пыгыт
армиян
тотвёсыт

5

Учёныит
акван-
атхатыгласыт

9

Сав
няврамын
щёмя

10

Соссаң
мир
культура

15-16

Нила хотал акв хотал хольт миначыт

Вас пәтлуптан вәр - малъ округу янытыл та оигпас. Ты элы-пәл үйхул үргалан мāt рӯпитан тит кӯщаиг ёт пресс-конференция олыс. А.Н. Залибеков ос Ю.В. Василенко тән сас ворт оlnэ үйхул үргалан мāt кӯщаиг рӯпитэг.

Та порат лавсыг: «Вас пәтлуптан кастыл винэ лицензия нәпак Россия янытыл аква тыныл олы – 420 солкōви». Ам хунь та нәпак магсыл миначум, 840 солкōви ойтуңкв лаввесум. Тынэ урыл ам тот тара титыглахтасум. Тән лавсыт: «Залибеков ос Василенко тән тәнтинәматыр ат вәгыг, хот манырсыр тын щирыл олы».

Хунь тын урыл титыглахтасум, алышлан махум ос ануменыл титыглахтасыт: «Кӯщаяныл ман сōль тох лавсыт, манос наң нас тох мовиньтэгын?» Тәнтыурыл вәңкв ат вәгыт, хулуңкв ат хулыгласыт. Манырсыр тыныл лававет, тасавит та ойтэгыт.

Та юи-пәлт ам вәнэ махманум палт Сургут, Нефтеюганск ос Нягань ұсытын тын тарапаттын магсыл звонитасум. Тән ұсанылт

ты нәпак тынэ 420 солкōви савит оlnэтэ.

Түяг ёхтын вас тәл мән олуңкв ат вөрмөв. Вөрн нила хоталын юрт хотпанув палт Владимир Меров ёт ялсумән. Победа хоталт мән Шапша павыл нупыл Анатолий Вадичупов воряан мән миначмән. Вас үрмувт аквписыг лүймә ёрныл ащирма туйтың ос раквың вот вотыс. Улпылтаймагсыл ты воряан сыс яныг аняң вас щар ат вәсув.

Торың щирыл вас пәтлуптаңкв ат әртмалас. Түрт вит вәта яңкыл пōлиглавес, хотыл ос няңра ащирмаң вотл вотыс. Лавуңкв те, вас үрнэ вәрмалы ты тәл щар ат әртмыс. Ты пор вас пәтлуптан вәрмалы мощ ётылнув вәруңкв кос әрыс.

**Александр
ВЬЮТКИН**



Муй нә мощаг хультум мирытыл пумщалахты

Финляндияныл мән мавн муй махум ёхталасыт. Хелена Аутио Мелони, Москва ұст посольстват рӯпитан нә, сосаң мир Ассамблеян вōвиньтавес. Тот хұрум депутатанув Е. Айпин, Н. Алексеева ос А. Филипенко тав ётэ потыртасыт.

Хелена лавыс, тән тәнтинә щирыл оlnэ махум, тыг ёхтыс сунсуңкве, хумус мощаг хультум мирытмōтыяныг мирытхалтōлэгыт. Хумус тән культураныл элаль тотыяныл, тәнтинәтәңыл потыртэгыт, манхурип тәрвитың вәрмалит оныщегыт. Тамле яныг округт аква миллион атсат сōтыра элумхōлас халт туп хус сōтыра сосаң хотпа оlnэгыт.

Еремей Данилович ювле потыртас, сосаң мир Ассамблея хотхуйплов тәл рӯпиты, ты сыс сосаң махум магсыл сав сәккон пирмайтәлвес, тōват хот-арыгтаптувёсыт. Ань мән магсылув титхуйплов сәккон олы. Ты щәнь ләтың үргалан сәккон, пёс йис әргыт, мōйтыт, потрыт, ялпың мāt, общинат, сәлы үрнэ махум магсыл ос мōт сәкконыт хансым

оlnэгыт.

Ты коныпал округу атпан нупыл нәлолов сәкконт ос янас лōмтыт мәнщит, хантыт ос ёрныт магсыл хасвёсыт. Россияв янытыл нәмхотты мāt тысавит сәккон әтим.

Мән округ Думавт таи ёмас, хунь матхурип сәккон щёпитаве, Ассамблея депутаты номтаныл ат те паты, тав элаль ат пирмайтаве. Тув ат рōвнэ ләтңыт хунь мұсхал щирыл хансавет, тōнт ушта пирмайтәңкве тәртаве. Ты урыл Дума Устав нәпакт тох хансым олы.

Хелена ёт театрыт рӯпитан махум ёхталасыт. Тән тыт ұст Еремей Айпин хансум потре щирыл спектакль суссылтасыт. Ты урыл мōтыт газетат тах ловиньтән.

**Галина
КОНДИНА**



Тот титыглахтуңкве рөви

Молалнув пәсныл округувт Единый информационно-справочный служба вәрвес. Ань кәсың хөтпа тув свонитаңкве вәрми, тав тот хұлтаве, хоты департаментыт манос хоты кұщай ёт потыртаңкве вәрми. Төва элумхолас шар ат вәгтә, такви тәрвитың вәрмаянә ёт хоталь минуңкве, хотыут титыглаңкве. Ань 8-800-100-8472 телефон хосыт свонитаңкве вәрмегын. Тыи мәгыс олн шар ат виве, щёпт оңнә телефоныл те потыртәгын, ос олн шар ат пуваве.

Вөрүв ўргалым оңьщелын

Яңк нәтнә этпос нилахуйплов хөталныл округувт вөр ўргалан вәрмалы овылтавес. Ты урыл природный ресурс ос несырьевой сектор экономика департаментныл ләтың тётвес. Мөлты тув сыс сака сав мāt вөрүв нәин тайвес. Таимәгыс ты тәл нәй харыгтан сав хөтпа рупитаңкве вуйвес. Ань округув янытыл 1005 хөтпа ты рупата вәруңкв патәгыт. Савсыр машинат ос эрнә пормасыт ёвтвёсыт. Хусахтем Ми-8 вертолёт ос Ан-2 товлыңхәп ты кас-тыл щёпитавёсыт. Акв ищхипың товлыңхәп олы, тав элумхолас тәл тыламлы ос та хосыт нәй тәнә мāt хөнтавет. Ты товлыңхәп руц ләтңыл «беспилотный летательный аппарат» ләваве.

Пенсия винә хөтпат олнаныл нөх-нётвёсыт

Пенсия олн винә мәхум Ханты-Мансийский Негосударственный Пенсионный Фондын ты этпос олнаныл нөх-нётвёсыт. Ты кастыл яныгполь этпост округ правительство кұщаянув пенсият ос социальный пособият 5,5 процентын нөх-нётнә мәгсыл нәпак хассыт ос округ думав тав пирмай-тасаныл. Ты олныт мәхум «губернаторский» олныг ләвияныл. Ань ты олныт тәл овылтахтам пәсныл ловиньтавет ос яңк нәтнә этпост (нила этпос сыс) оятавет.

Хұрум тәл сыс ты олныт акваг нөх-нёттавет. Ханты-Мансийский НП Фондыныл 200 сөтыр хөтпа пенсия-олныл оятавет. Тән Россияв янытыл оләгыт. Хуньт тыт рупитасыт ос ўшдахтуңкв минаманыл порат мөт мән олмыгтасыт. Йильпи сәккон щирыл тыт округувт рөви ат олуңкве.

Ляххалыт мәньщи
ләтңыл Галина
КОНДИНА хассанә.



Пәвылн миннә лёккарыт олныл оятавет

Наталья Комарова, губернаторув, такви вәаңын хөтпанә кәсың сәт акван-атыг-ल्याнә. Тот тән савсыр постановление ос распоряжение-ләтың пирмайтәгыт.

Ань тамле сапрәнит кұщайт мәньлат лёккарыт мәгсыл хансым нәпак урыл потыртасыт. Ханищтахтын мәныл астын мәньлат хөтпа пәвылн лёккарыг рупитаңкве ке мины, тав акв миллион солкөвил оятаве. Руц ләтңыл ты олныт «подъёмный» ләвавет. 2012 тәл сыс 22 мәньлат лёккар савсыр пәвлытн мәхум пусмалтаңкве минасыт. Ань йильпи пирмайтым нәпак щирыл мәнь лёккарыт олныл ос нётуңкве патавет. Акушерыг ос фельдшерыг ханищтахтын мәньлат агит-пыгыт хоты мәнь пәвылн рупитаңкве ке минәгыт, тән ос 500 сөтыра солкөвил тах мивет. Наталья Комарова ләвыс: «Ты тәл сыс округ яны-тыл мәнь пәвылкветт

йильпи ФАПыт тах ўнттавет. Мәньлат хөтпат йильпи пұльницан рупитаңкве вос ёхтәгыт. Тамле пұльница пөхыт ўнттым колытт пәвылн ёхтум лёккарыт олнә ко-лыл мивет.

Аквта сапрәнит мәхум ос акв нётмил урыл потыртасыт. Пирмай-тым нәпак щирыл 16 ўсыт ос районыт олныл тәставет. Тән халанылт акв миллиард солкөви ләкква-уртаве. Ты хосыт тән мир мәгсыл рупитан мәхум сәлнә олнаныл нөх-нётяныл.

Мәшинал яласан ләңхыт урыл потыр олыс. Ты рупата мәгсыл ань ос яныг олн тәстувес. Ты тәл тәстым олны-тыл Вах я ўлтта унсах варава. Ос ты коньпал ос сав ләңхыт ёмашакв щёпитавет.

Людмила ТЕТКИНА

Москваныл ёхталам кўщай



Александр Сергеевич Галушка «Деловая Россия» намба организацият рўпитан кўщай хум Ханты-Мансийск ўсн ёхталас. Ты организация 2011 талт яңк нәтнә этпост рўпитанқве ывилтахтас. Тот «Почта России», «Российские железные дороги» ос мот савсыр организацият акван-нётхатым рўпитәгыт.

Александр Галушка округ кўщайт ёт хонтхатыглас ос савсыр рўпата урыл тән ётаныл потыртас. Ос тыт предпринимателит хумус рўпитәгыт, ты урыл тав ос пўмшалахтас.

Югра мавт манасавит ма-вой нөх-вие, ты урыл округ губернатор ваңын хум Александр Ким латың лавыс. Мән округув ты рўпатал сав олн сәлы. Юи-ывил хўрум тал сыс акваг мощчанув ма-вой нөх-вие. Округувт 16 ўс ылы, тән туп ты рўпата вәрим олн сәләгыт. Ты ўсытос округув янытыл мир хумус элалы ылуңкве паты, ань номсахтуңкве эри. Тымагсыл тамле предпринимателит тыт ос сака эрәгыт.

Ты тал сыс Россия янытыл 450 сөтыра предпринимателит рўпата тал хультыт. Тән пуссын тәнки рўпатаныл

хосыт щәмьяныл тыт-тысаныл ос тән палтаныл рўпитам хөтпат ос пөхын та кәтсаныл. Ты яныг тәрвитың вәрмалы урыл тән Россия Президентын потыртасыт. Ты махум вәрмаланыл хотёрувланқве ат рөви. Тән мұсхалыг ке рўпитәгыт ос сав олн сәләгыт, Россияв ты хосыт ос щәлыңыг ёмты.

Ты юи-пәлт кўщай хум ляххал тотнә махум ёт хонтхатыглас. Ос тәнки организацияныл вәрнә рўпататә урыл потыртас.

Лүпта этпост тән яныг съездын тах атхатыгләгыт, тәт кәсың кәсаңан элумхөлас «Общественный народный фронт» намба организациян хасхатуңкве вәрми. Ань тув савсыр партият хансым ыләгыт.

**Людмила
ТЕТКИНА**

Яныг ўст ылум суссылтап

Ты этпост «Сокровища Севера – 2013» намба суссылтап Москва ўст рўпитас. Мән округувныл махум мәнщи, ханты савсыр пормасыт, маснутыт суссылтаңкве ос тәнүт тыналаңкве тув ялсыт.



Тув хөт община «Колмодай», «Росомаха», «Обь», «Верхне-Вахская», «Лангки», «Регион-К» вөвиньталвёсыт. Тән нёвыль, хўл, пил, лахыс, павксам ос сав мот тәнүт тот тыналасыт. Тув тотыглам тәнүтаныл ат хөтал сыс пуссын тыналасаныл. Төва общинат 150 сөтыра солкөви сәлсыт, мөтаныт тыгыл савнүв – 400 сөтыра солкөви.

Мәщтыр хөтпат тәнки вәрум, юнтум, сагум пормасаныл суссылтаңкве тув ос тотыгласаныл. Тот турлөпсыт, пальсакыт, сәсныл вәрим савсыр тотапыт, рактыл пөщгим анысә-

ныт сусылтавёсыт ос тыналавёсыт. Мәщтыр хөтпат суссылтапын ёхталам махум мәщтырланқве ханищтасаныл. Тән сакныл хорамыт хартсыт, аканит юнтсыт ос мот савсыр щирыл мәщтырласыт.

Суссылтап рўпитам сыс округ махманув тот янытлавёсыт. Тыгыл тотыглым выставка «Диплом I степени» нәпакыл майвес. Ты коньпал кәсың мәщтыр хөтпа ос янытлан нәпакыл мўлуптавес.

**Людмила Алфёрова
көтум ляххал мәнщи
ләтңыл Л. ТЕТКИНА
хансыстә.**

КҮЩАИТ РҮПАТАНЫЛ

Павылт рүпитан миркол хум

Хальүс район Саранпавылт Миркол кұщайт Николай Никитович Артеев китыт тал рүпиты. Тав тув пәриим порат тара мань павлытын ялыс. Сунсыс, хумус тот махум олэгыт, маныр вәрмалъ тән оньцёгыт.



Ты элы-палт Николай Никитович мот мат олыс. Университет асламе юи-палт хұрум тал Саранпавылт школат кұщайт рүпитас. Тувыл ос нявраманән тот олүкве ат артмыс. Таимәгыс тав щемьян тагыл мот мән олүкве вантлыс. Та пасныл пуссын аквёет ват нупыл сат тал павылт ат олыс. Ань нявраманэ пуссын янгыт, тәнки щемьяныг ёмтсыт. Хум яныгмам матэ тал кәсэ холас, таимәгыс ювле ёхтыс.

Тав хунь Саранпавылт ёхтыс, тот миркол кұщайт пәриян пора ляпамас, тав остув пәрияхтүкве номылматас. Эрнэ нэпаканэ атсанэ. Мощ олыс, пәрияп та ёмтыс. Тав тот олнэ мирн ёмшакв ваве. Таимәгыс павлың махум савнүв нэпак тав мәгсылэ таратасыт.

Николай Никитович тохлавыс: «Ам мань павлыт мәгыс сымум сака щәрги. Таимәгыс тыг ёх-

тысум, матыр эрнэ тәла махум мәгыс вәруңке таңхегум. Тән олупсаныл кұпнитнүвег ке вәрилум, анумн ёмас паты. Хумус вөрмәгум, таил нётәгум. Мань павлыт нөх-вөрмалтаңке эрэгыт. Сұкыръя, Сортыңъя, Лопмус ос мот мань павлытт сав тарвит вәрмалъ олы.

Пес порат махум акван-нётхатым олсыт. Павлытт мирн пуссын рүпата ошсыт. Уйхул янмалтасыт, хұл алышласыт ос вораим яласасыт. Ань торың рүпата атим. Хуньт сав мирн олым павлыт ань акваг вуньшчалыг патэгыт, маньлат хотпат эл миныглэгыт. Ань тамле номт тотүкве эри, махум акван-юршхатым вос олэгыт. Аквёет мән сав эрнэ тәла вәрөв. Эрың ләшәл-ләшәл павланув нөх-вөрмалтыянүв».

Николай МЕРОВ

Пыгыт лусытаңкве тотвёсыт

Молал ляххал тотнэ хотпат Юрий Буров, Округүвт рүпитан комиссар-кұщай, ёт хонтхатыгласыт. Хум журналистыгн маньлат пыгыт лусытан овылтыт ос Победа янытлан хотал урыл китыглавес. Тав ювле маныр лавыс, потре элалъ ловиньтэлын.

Яныгпөлэ этпос овыл хоталэныл маньлат пыгыт армиян винэ элы-палт ләккарытын сунсуңкве патвёсыт. Округ янытыл 22 комиссия рүпитасыт. Ань Югра мавныл 1 сөтыра 427 пыг армиян минёгыт. Ты этпос атхуйплов щислат овыл атхуйплов пыг Президентский намба полкын лусытаңкве тотвёсыт. Мотаныт лүпта этпост тах кётавет.

Мән пыганув савсыр ұсың манос павлың мән тотавет. Ос пыгыт хоталь вивет, округ комиссар ос мот военный хотпат ат вәганыл. Тамле вәрмалитыл Генеральный штабт рүпитан махум тәнки

кұщайлахтэгыт. Та кұщайтн ләтңыл кётавет, округныл манасәвит пыг армиян атуңкве эри, тән таширыл элалъ та рүпитэгыт. Тувыл мән сәлтатанув янгыш пуссын тосам ма тармыл лусытэгыт, ос хұрумсәт сәвит пыг Морфлотын вөвавет. Ос сака тәксар маньлат хотпат ВДВ, ФСБ, ДРУ намба мән вивет. Тот пуссын ёмшаквөг хаништавет.

Военный армият лусытаңкв ат тахнэ пыгыт нас рүпитан щирыл патхатэгыт. Руш щирыл тав «альтернативный службаг» ләваве. Тох маньлат хотпат пұлыницаң рүпитанкве вивет, колкан ловтнэ манос мот рүпатан кётавет.



Тыт төва пыгыт Нижневартовскат матумпала ос ағмың-мосың, сак-ватахтам хотпат ошнэ интернат-колт рүпитэгыт.

Ос армияныл түйтыглахтын хотпат тән тәнки ат кинсыяныл, таимәгыс төва пыгыт лусытан тәланыл төвлынэныл мус (ват нупыл сат тал) хот түйтыглахтэгыт, тувыл армиян воссыг ат ви-

вет. Военный комиссариат ань полиция ос УФМ службаг ёт акван-нётхатым рүпитаңкве лавхатсыт. Маньлат пыгыт нәмхот ат ке лусытэгыт, тән государство пәлыл нәматыр нётмилыл ат мивет манос тамле хотпа ётыл кұщайт рүпитаңкве тах ат тартаве. Та тәланэ төвлын мус туп сутытым хотпа армиян ат виве.

Тамара МЕРОВА

Няврамыт ул вос марщумлавет

Варъёган павылт 2005 тал пәсныл Няврамыт йильпи школат ханищтахтукве патсыт. Интернатаныл ос аквты колт олы. Тот няврамыт хумус ханищтавет, маныр пұмыш вәрёгыт, ты урыл школа кұщай вәңын нә Наталья Сергеевна Карабаева потыртас.

- Ам тыт 1988 тал пәсныл рұпитэгум, овыл классыт няврамыт ханищтасанум. Тән хосат школав асласыт, ань тәнки нявраманыл тыг ялантэгыт. Ётыл ханищтан тәлатыт пұктотнә хөтпаг рұпитасум, мөлтос кұщай вәңыг хөтпаг паттувёсум.

Ты тал тыт 122 аги – пыг ханищтахтэгыт, тән халанылт 111 – ты сосаң няврамыт. Хус няврам

литература ос история Югры нампа урокыл вәравет.

Ты коньпал тән кружокытын ялантэгыт. Тот агит сакныл пальсакыт, турлөпсыт хартэгыт ос хорамың супыт юнтэгыт, пыгыт матыр сәгрёгыт, ёргёгыт. Совныл манос пунныл ёмас пормасыт мащтырлэгыт. Агит сов юнтуңкве ос сак хартуңкве Дарья Даниловна Айваседан ха-

мысловый база» нампа колыл үнттувёсүв. Тот вөрүй-витхүл алышлан пормасыт няврамытн суссылтавет. Ты пормасыт труд урокыт тәнки вәруңкве ос вос вөрмияныл. Пыгришит тот ләс үнттуңкве ханищтавет ос кәркамыг хүл алышлэгыт. Агит

тәгыл аквёет рұпитэв. Туп мәнәлат хөтпа тыт мощца, тән няврамыт ёт рұпитаңкве ул хурахлэгыт.

Ос таи ёмас, мәншколав аслан агит-пыгыт тыт ос рұпитаңкве патсыт. Роза Гордеевна Казамкина Ханты-Мансийскат колледж асламе



хүл исмит пайтэгыт. Тув ялнә хоталыт няврамытн сака мұстэгыт.

Няврамыт акв сменал ханищтахтэгыт, обед юи-пәлт 1-6 классыт ханищтахтын агит-пыгыт продлөккан хультэгыт. Мөтаныт кружокытын хайтэгыт. Павылт манос интернатт өлнә няврамыт тыт нәмхуньт ат марщувлавет, тәла тәл ат өлэгыт.

Школавт аквхуйплов сыресыр кружок рұпитэгыт. Мән «Театр народной сказки» оныщөв, няврамыт тыт ёнгалтым щань ләтңыл потыртаңкве ханищтавет. Тувыл каснә мән ялантэгыт.

Мәнки палтув рұпитан хумыт коньпал Новоаганск павылныл «Олимп» нампа центр хөтпат нявраманув тренировайтаңкве тыт ос ёхталэгыт.

Ханищтан хөтпат ос воспитателит тыт тахолыт төвылхатэгыт. Мән ты махманув ёт хосат

юи-пәлт тыг рұпитаңкве ёхтыс.

Мөт аги Излучинск павылн рұпитаңкве минас. Школа аслам агиянув-пыганув савыңпәлэ Нижневартовск үсн строительный манос педагогический колледжин элаль ханищтахтукве минэгыт. Төват Ханты-Мансийскан минуңкве кәсащэгыт.

Ты тал мән аквхуйплов класс ат оныщөв, мөлтос тал онтолов классыт ханищтахтам няврамыт пуссын ләкква-мингаласыт. Ос ты тәлтат няврам лов классыт ханищтахтэгыт.

Интернатт өлнә няврамыт ул вос марщувлавёсыт ос ёмщаквег вос ханищтахтасыт, мән тыт матыр пұмаш тәлат акваг вәрыглэв.



вөрт өлнә мәныл тыг тотвёсыт, тән пуссын интернатыт өлэгыт. Варъёгант ос сав сосаң махум олы. Щар яныг ханты колтағлыг тыт Айпиныт, Казамкиныт ос Сардаковыт ловиньтахтэгыт. Ос ёрн яныг колтағлыг тыи Иуси ос Айваседа. Мән школав национальный ләваве, тәнки щань ләтңыл потыртаңкве ханищтавет. Тувыл лұимә махум

нищтавет. Тән аквёет такем хорамың пормасыт вәрёгыт. Вәрум утаныл мұй махумн тәра ёвтавет.

Пыгытн «Охотоведение, рыболовство» кружок мұсты. Няврамыт ёт тот Семён Алексеевич Айпин рұпиты. Тав йивныл хорамың щанквыт ёргуңкве хасы, таимәгыс РФ мащтыр нам оныщи. Тувыл я вәтавт «учебно-про-

ХАНИЩАП

Тан щань латңыл потыртаңкв ат кәсәщегыт

Касум павыл интернатт сав соссаң нйврам ҕлы, Ктан тув Нумто ос Юильск павлыгныл то-тавет. Щаняныл-ащаныл пуссын сәлы үрөгыт, ос та мән павлыгт школа атим, таимагыс ты тан интернатн атавет.

Ань тув 45 ханты ос ёрн нйврам тотыгла-вет. Мәннун нйврамыт ҕвыл этажт ҕлөгыт, яныг нйврамыт ос нумын. Тув ялмув хоталт тот сәлың махум ялпың хоталаныл ҕлыс. Кос алпыл сәт щёс ҕлыс, мән нйврамыт нәмхотыут ат хуяс, пус-сын коридорт үнлахол-сыт манос тыгле-тувле нас ёмыгтасыт.

Эти рүпитан нә **Валентина Евтифеевна Багишева** тан ётаныл үнлыс, това агиришит атаныл саганэ. Пыгри-шит ос пуссын ляпат роттыг үнлантасыт. Нә титыгласлүв, ущты сәт щёсыг ёмтыс, нйврамыт

манрыг ат хуёгыт, тав ювле лавыс: «Щаняныл-ащаныл вөрныл касуңкв тыг ёхтысыт, таимагыс нйврамыт тананыл үрим үнлантэгыт, ань тах рута-нылн юв вивет».

Интернат урыл тав лавыс, нйврамыт школан миннэ пораныл хунь ёхты, интернатн тотавет. Туп тәлы каникул порат юв ялөгыт. Ань ты-гыл маснугыл ат мивет, ляпа рутанылн ёвтавет. Интернатт ҕлнәныл по-рат кәсаныл сака холы, юв воратэгыт. «Татем тананыл сәль», – нә лавыс.

Такви В. Багишева ҕс Касум павылныл ҕлы,

тот самын патыс, хум вәрыс, пыге ань яныг, 24 тәлэ төвлыс. Интернатт нәлолов тал рүпиты, нәмхот ат ханищтахтас, ты рүпатал та майвес. Павылт рүпитан ма вос-сыг атим.

Воспитателиг та хоталт **Любовь Викторовна Захарова** ҕлыс. Тав школат ҕвыл класс учителяг рү-питы, нас та хоталт ин-тернатн рүпитаңкв вөв-вес. Тав ётэ потыртаммән порат тәра-патыс, Мария

Ам таве элаль титыг-лылум:

– Наң ҕйкан хотыют?

– Ханты.

– Нән юн нәнти ха-лынт ханты латңыл по-тыртэгын?

– Ати, төванакт, хунь нйврамагмәнныл матыр ёл-түйтуңкв эри.

– Нйврамагын ләтың торгамтэг манос потыр-тэг?

– Ати, сас туп-туп, акв-тит ләтың торгамтэг.

Тох ты ёмтыс, мәнти



Соня Каксина, Л.В.Захарова ос Алиса Молданова

Волдина – тав акве, ома-тэ Валентина Кузьми-нична тавән эщиг ҕлум. Л. Захарова школат хус тал рүпиты. Нйврамыт урыл лавыс, ань ханты ос ёрн нйврамыт ворт щаняныл-ащаныл ёт кос ҕлөгыт ос щань латңаныл ат вәганыл. Халанылт янге-мәне пуссын руц латңыл потыртэгыт. Тө-ват торгамтэгыт кос ос матыр лавуңкв сака эссамтэгыт. Яныг клас-сыг ханищтахтын нйвра-мыт төват ҕс кос потыр-таңкв хәсэгыт, ос тан хунь матыр потыртаңкв вөвавет, ювле лавөгыт: «Анумн ханты ләтың шар ат эри, нәмхуньт аты эрмыглы».

Ханищтан нә титыг-ласлум: «Манрыг тох ёмтыс?» Тав лавыс: «Ты щанит ос ащит тан нй-враманыл ёт юн ат потыр-тэгыт».

ләтың вәгув кос, ос нй-враманув латңув шар ат вәганыл. Вәим, ты вәрмаль ма янытыл ҕлы. Лүимә яныгыл ҕлнэ мощ-щаг хульгум мирыт пус-сын тамле вәрмалын ань ярмысыт.

Элаль Любовь Захарова акв ёрн аги урыл по-тыртас. Ты агирищкве школан 1996 тәлт тотвес, руц латңыл шар ат по-тыртас, аты торгамтас. Школат ханищтахтаме сыс руц латңын ханищ-тавет. Школа астаств, хум вәрыс, ань хот Даге-стан мән тотвес, тот ҕлы.

Ань мәнщи, ханты ман ёрн ләтың элаль тот-нә магыс сав рүпата кос вәраве – сакконыт ханса-вет, хотыут щань ләтың ёт рүпиты, олныл ойтавет. Ос матрыг латңанув та ёрувлахтэгыт.

В. ХОЗУМОВА



В.Е. Багишева ос Саша Каюкова

Сәлың колт яласан нәкве

Тэлы порат ам Хальүс район
Саранпавылн рупатам щирыл ялсум.
Тот акв нә ёт потрамасум. Тав наме Анна
Дмитриевна Ромбандеева.

Ты мәньши нә Хальүс район Лопмус павылт яныг щёмят 1970 тәлт самын патыс. Кульпас павыл школат нёлолов класс әстлас. Та юи-пәлт 1987 тәлт хум вәрыс. Ту-выл ойкатән сәлың колн тотвес. Та пәсныл акваг тот ты рупиты.

Хунь сәлың колн ывыл щёс ёхтыс, тот рупитаңкве тәрвитың олыс. Ётыл ләшәл-ләшәл ханьщувлас. Анна Дмитриевна ёрнколт сәлы совныл сәвсыр маснут юнты, тәннут пайты. Ойкатә наме Василий Владимирович Ромбандеев. Тав сәв тәл сәлың

колт рупиты. Нәк-хумыг ат няврам янмалтасыг. Яныг агитән Людмила Ханты-Мансийск үст нәпак ловиньтан колт рупиты. Кит агиягән пыгагән Ханты-Мансийскат ханищтахтәг. Пити патта няврамән Женья иң мәнь, тән ётән олы.

Яныг пыгән Яков школа әстламе юи-пәлт ыс тән пәлтән рупитаңкве минас. Ты тәл сәлыл каснә вәрмәль олыс. Тән пуссын касылын нәлув вәгылсасыт.

Сәлың нә ләви, рупататә мәгыс сака мощ-ща олныл ойтәве. Этпос



сыс нилахуйплов сөтыра солкөвил туп миве. Ты вәрмәль мәгыс совхоз кұшай пәлт сәв щёс потрамаңкве ёхталас. Ос олныт нөх аты нётвёсыт. Таимәгыс мәньлат хөтпат сәлың колт рупитаңкве ат касашёгыт. Ты тәл рупата олныт нөх-нётуңкве ләввёсыт кос, ос мансәвит ат вәганыл, ань махум үрхатёгыт.

Анна Дмитриевна оматә Наталья Григорьевна ос әтятә Дмитрий

Петрович Таратовыг Лопмус павылт ыльсыг. Ёкваг-ойкаг ыльмән палытыл хұл алыщлым ос вөраим яласасыг. Ань сас атимыг.

Ам Анна Дмитриевна колтәглә янытлан ләтңыл кётылум. Нявраманьн, рүтаньн, юртаньн ос вәнә хөтпаньн ёт пүстәгыл сәв тәл элалё ыльн.

**Николай
НИКИТИН**



Яков пыгән, 2012 тәл.

В. Узель вәрүм хури

Соссаң мирыт посың хоталн агтэгыт

Ас-угорский институтт рүпитан хөтпат китынтыг конференциян атхатыгласыт. Тыг савсыр яныг ұсытныл ос мөт мәныл учёныит ёхталасыт. Тән «Современные проблемы природопользования и вопросы традиционной культуры коренных народов Севера» вәрмалит урыл потыртасыт. Ос өвлөт махум кит учёный хөтпаг янытласыт, тыи Т.Г. Харамзин ос С.А. Попова.

Ханты ойка Терентий Герасимович Харамзин 75 тәлэ төвлыс. Тав соссаң махманув тәрвитың вәрмалит тәра-паттыянэ, тәна-ныл мұсхалыг ханищ-тыянэ ос ётыл ёрнэг щёпитан нак кин-сы. Ма-вит ўргалан вәрмалит ос сәлы ян-малтан урыл савсыр потрыт ос нәпакыт хансыс. Ойка социология наука доктор нам оныщи, ты коньпал «Заслуженный деятель науки РФ» яныг намыл майвес.

Светлана Алексеевна Попова 60 тәлэтыл янытлавес. Тав история наука кандидат нам оныщи, ань ос наука доктор нам магыс элалъ рүпататэ хансытэ. Нэ диссертация нәпакёт мәныщи махум пёс йис олупса вәрмалит акван-атыянэ. Тав 1993 тәлт Хальўст мөйтыт, пёс йис потрыт акван-атнэ фонд-кол пұнсыс.

Ань тыг ёхталам учёныит кит секциян ур-хатым рүпитасыт. Овыл секцият историкыт, культурологыт ос лингвистыт акван-атхатыгласыт. Тән «Вопросы реконструкции тради-

ционных праздников и обрядов в современных условиях» вәрмалит урыл потыртасыт. Ань пёс йисныл өлнэ на-канув янытөт осн-пат-туңке эрэгыт манос



әти, хумус тәнаныл элалъ тотуңке, маныр сусылтаңке рөви, мә-нылат агит-пыгыт Нәй-Отыранувн агтэгыт ма-нос әти – пуссын ты овылтыт акван-атха-там махум тәнки хала-нылт моц воращласыт ос ётыл акв тәла вәрнэ ләтың хассыт.

Пёс махманув мөт мирыт ёт хурахлым олсыт, тәнаныл ляпан ат тартыгласаныл. Ялпың мат ўргаласаныл, пұр-лахтын канын пөх

хөтпа шар ат вө-виньтәлсыт. Тувыл кәсың сәт тәл хум хөт-пат тәнки Нәй-Отыр канытн йирхатуңке ялсыт. Нэ хөтпат ос тәнки пұрлахтын ма ошсыт. Тамле тәлат хунь вәрыглаңке, ул нәйт хөтпатн хұлтыглавёсыт ос элын өлнэ хум ма-хум акв порат акван-хөнтхатыгләлсыт.

Ань тай мөт порат ёмтыс, хум махум кәсың сәт тәл ялпың маң ат ялантэгыт. Ты нак ань

торың ёмшаквег ат ханищтәлвёсыт ос нәпакн ат хансыг-лавёсыт.

Мәныщит ос хантыт туп мөт махумн ләвёгыт: «Тыи ат рөви, таи ат тайи, тув ул новхатән, тув ул пұхтән». Ос ма-ныр магыс ат рөви, ма-ныр ат тәртаве – ма-нос олы? Тыгыл элалъ ат хұлтыглавет, маңки ос түйтыглахтэв. Ту-выл руц манос мөт хаштәл махум ялпың маң минёгыт, хөт ат эри – хәхталахтэгыт, пёс пормасыт нови-яныл, тармыл ялыг-лыяныл манос ёт әл-майияныл. Таимәгыс соссаң махманувн лөль ёмты, ёмас өлнэ хөтал ат хөнтэгыт, номтаныл саватавет. Ань тамле тәлат ёл-пөилттан ма-гыс махум ёт ёмшаквег потыртаңке эри. Ма-тыр хұлтыглан ләтың «Памятка» нәпак-лөпс щёпитануве ке, ёмас олнув. Ос соссаң маң-лат агит-пыгыт ёт вә-тихал акван-хөнт-хатыглаңке эри, тә-нанылн пёс йис вәр-малит урыл потыр-таңке.

Мөт секцият социолог ос экономист учёны-итакван-атхатыгласыт. Тән ос ма-вит ўргалан вәрмалит урыл потыр-тасыт. Сәлы тәпың ма сәв хультыс маң әти, ху-мус тән ўргалавет – та урыл ләтың хассыт.

**Тамара
МЕРОВА**



Сав няврам оныщег

Зоя Васильевна Кирилишина щёмыяң тагыл Сургутский район Русскинская павылт олы. Ойкатэнтыл хот савалап няврам янмалтэг.

Тэнки агитэн янгыг ёмтыс, такви щёмыяң. Зоя Васильевна лавыс: «Агим янгыг ёмтыс, ам савалап пыгрищ янмалтаңкве патсум, тонт тав кит талэ товлыс. Ты юи-палт ос акв мань савалап агирищ вислум. Ты няврамаквег ам амки нупылум хассагум, тонт нэмхотють

няврамыт нэпаканыл хунь варсанум, тонт лаввёсум, амки нупылум воссыг ул вос хансыянум. Тыщирыл тан савнум льготта оныщегыт ос савнум олныл ойтает. Ос янгыг хунь ёмтэгыт, колыл мивет. Павлувт ань рупата атим, няврамыт янмалтан маг-



анум ат лавыс, тыщи-варуңкве ат кос эрыс. Ань тэн савалап няврамыг воссыг ат ловиньтахтэг. Посobie-олныл ойтает кос, тувыл савсыр льгота ат оныщег. Ос хунь яныгмёг, савалап няврам хольт олнэ колыл тах ат мивёг.

Ты агиришиг-пыгришиг янмалтым ам ос нила няврамакве амки палтум висанум. Ты

сыл ойкамёнтыл олныл ойтавемён. Ты вармаль руш латңыл «замещающая семья» лававе. Тананыл пуссын маниг олманыл порат висанмён. Мёнамён щаниг-ашиг лавияныл.

Яныг пыгум сат талэ хунь товлыс, ман Русскинская павылын вантласув. Ты элы-палт тал сыс ворт олсув. Ань туп туи порат пёс йис мавн ялантэв. Тот ман

салы ўрим, вораим, хул алышлым олэв.

Нявраманмён савсыр национальностил олэгыт, тан этанылам ханты латңыл туп потыртэгум, латңув ос вос ваганыл. Руш латңыл потыртаңкве школат ханищтавет.

Ань ам кушайт палт акв тарвитың вармаль эт ялантэгум. Тасавит няврам онышмён, колув сака мань.

Ань сав няврамың щёмыят мал мивет. Ам ос заявление-нэпак очередь магыс хассум. Ойкам эт субсидия-олн виңкве нэпаканмён кётсанмён. Русскинская павылт яныг кол ўнттуңкве таңхимён. Олн винэ очередь мощёрт ты ёхты, ма ат онышмён. Павлувт кол ўнттын ма ат товылхаты.

Сергей Черкашин, Сургутский район миркол кушай ваңын хум, Русскинская павылт сапрани варыглас. Ам тавён амки тарвитың вармалюм урыл потыртасум. Кушай хум нётуңкве лавхатас, мал мивемён, мощ ўрхатуңкве туп эри».

Ам ты нэг-хумыг щёмыя янытлан хоталыл янытлыягум. Нявраманэн сав щагт тэнатэн вос тотэгыт. Кол ўнттын мал моляхнув вос мивёг, йильпи кол ўнттын порат туп няврамыт мовиньт тот вос суйты.

**Людмила
ТАСМАНОВА**

Саран махум акван-атхатыгласыт

Хальүс район Саранпавылт сәлыл
каснэ вәрмалы олум порат саран
махум тәнэ колт акван-атхатыгласыт.
Атың тәнүтың пасаныт щёпитәлвёсыт.
Тот щай айсыт ос пёс йис олупса
номылматыгләлсыт. Элыл ёхталам мүй
махум ос тув вөвиньтәлвёсыт. Маныр
урыл тән тот потыртасыт, нән ань элалы
ловиньтән.

Касың хөтпан вәңкве
эри, хөтыл тав опатэ,
ашоёкатэ олэгыт. Са-
ран махум тув хуньт
Коми Республиканыл
вәнтлысыт. Пёс порат
нёр тапалыт сараныт
сәлыяныл матыр агмыл
ёмтсыт. Ты хосыт сав
сәлы патыглас. Махум
яласан ут ос тәнүт тәл
хулытсыт.

Таимәгыс онтолов-
хуйплов нот овылтахтам
порат төва саран хөтпат
хулытум сәлыяныл ёт нёр
үлтта тыг вәнтлысыт.

хөнтсыт, тот ёрнколаныл
түщтысаныл. Түяг та ма
витын ат амарава. Ань
ты павыл Саранпавлыг
ләвава.

Хум хөтпат түяг кол
үнттын мәгыс норыт
яктысыт. Төва махум
маколт олсыт. Овыл ко-
лыт Филипповыт, Кане-
выт, Артеевыт үнттысыт.
Тыгыл элалы Ануфрие-
выт, Истоминьт, Хозя-
иновыт, Рочевыт, Кусты-
шевыт, Семяшкиныт,
Вокучевыт ос үнттуңкве
патсыт. Элыл ёхтум

төва хөтпат рүтаныл
Саранпавылы ёхталэгыт.
Саранпавылт мәтэ
сака нётнэ, атырхари
хөталытт нёрквет нас
вольгёгыт, сыстамятсак
хольт овантэгыт. Мүй
махумн тот үщлахтуңкве
сака мұсты. Төва хөтпат
ос тәнки рүтаныл ань тыг
мус ат вәганыл. Нёр үлтта
вәнтлуманыл пәсыл ат
вәщиныхтахтасыт, иң
кисхатэгыт.

Тувыл ос янас мин-

Республиканыл саран
махум ёхталасыт. Тән
рүт махманыл ялпың
хөтал кастыл сака яныт-
ласаныл. Ань нёр та-
палт олнэ саран хөтпат
сәлыл каснэ вәрмалы ат
вәрыглэгыт. Тәнаньыл
тыи сунсуңкве сака
пұмаш олыс.

Тувыл ос акв тәла
урыл потыртасыт. Саран
махум пёс йис порат нёр
үлтта минам лёңханьыл
хот-щёпитаңкве ном-



нэ тованыл урыл по-
тыртасыт. 1903 тәлт
Саранпавылы Иван
Ефимович Истомин
Евдокия экватэнтыл
ёхтысыг. Тәнәтэныл ты
Саранпавылт олнэ Исто-
миньт элалы савмёгыт.
Экваг-ойкаг щёмьят ат
няврам янмалтасыг.
Истоминьт ань тыг
мус яныгсәт лов тәл
Саранпавылт олэгыт.

Яныг хөнт олум по-
рат Саранпавылыныл сав
саран хөтпа хөнтлуңкве
тотвёсыт. Төва хөтпат юв
атёхтысыт, тән ураньылт
ань олнэ махум акваг но-
мияныл.

Ты тәл павылт сәлыл
каснэ вәрмалы олум по-
рат Нёр тапалыл Коми

сыяныл. Хуньт тувыл
яласаңкве эрың патэ-
гыт. Та лёңх палытэ
нёлсәткем вёрыста олы.

Сапрәни олум порат
Хальүс район кұщай Лю-
бовь Константиновна
Коротун ос тот олыс. Тав
махум пуссын янытла-
санэ. Төва саран хөтпат
мүйлупсал ос янытлан
нэпакыл мисанэ. Ты
нётнэ махумаветн сав
сымың ләтың лавыс.
Ты вәрмалы ойгпам юи-
пәлт саран махум акваг
пөслахтасыт. Вәтихал
акван-атхатыглаңкве
ләвхатсыт.



Мәнъя хосыт порыл
лөңхаль тәртахтасыт.
Овлэт Ясунт павылы ёх-
тысыт. Павлың хөтпатн
тәнүтыл майвёсыт.
Ос олүңкве тот ат
тәртвёсыт. Тувыл тән
лөңхальнунвәтылтасыт.
Саквъя вәтаткарснүв ма

махум вөруиң, хұлың,
пилың ма тармыл яныг
щәгтыл олмыгтасыт.

Та пәсныл сав тәл
минас. Төва хөтпат ань
тыг мус та рүтаныл ёт
вәйхатэгыт. Вәтихал
мүйлуңкве нёр тапа-
лын ялантэгыт. Тувыл

Ягрим павылт ӧлнэ нэ



Аквнакт ам Хальӱс район Ягрим павылн Атӱла мус ялсум. Мӱнки павланувт хӱтал китӱвилт миннэ ӱр ат яласы. Матыр тӱла маӱгыс хоталь минмыгтӱгын, матпалыт та яласӱгын. Ягрим павылт акв мӱнӱщи нэ ӱт хӱнтхатыгласум, наме Зоя Алексеевна Мелентьева. Мен потрумӱн ӱлалъ ловиньтӱлӱн.

– Зоя Алексеевна, наӱки урынтыл мощ потыр-тӱн. Омагн-ӱтягн хотыл ӱлсӱг? Хумыс наманӱн?

– Омам Ульяна Алексеевна Саратина, ӱтям Алексей Спиридонович Мелентьев Люлюкары павылт ӱлсӱг, тот акван-хӱнтхатсӱг. Хунь Ягримн вантласӱг, омам совхозт рӱпитас, ӱтям нӱй харыгтан мӱт рӱпитас. Опам Спиридон Лазаревич, ӱтям тав ӱтятӱ, лӱолиг ӱӱхтахтыглым порат Сортыӱят репрессировайтавес. Щащӱквам нила нӱврамыӱ тӱгыл ювле Люлюкары павылн вантласыт.

– Ягӱги, ягпыг-ӱпщи ӱнӱщӱгын?

– Мӱн нила ӱлсӱв, Геннадий, Валерий, Григорий ос ам. Кит ягпыгагум ӱтимыг. Яныг ягпыгум Краснодар ӱс нупыл вантлӱлас, Кубаньт ӱлыс. Тот нӱй харыгтан мӱт рӱпитас,

олн атыс, кол ӱвтис. ӱла минас, сымӱтыл лӱолиг ӱмтыс. Пыгаге ос ӱкватӱ хультсыт, тот ӱлӱгыт. Тӱва порат тӱн палтаныл ялантӱлӱв.

Акв ягпыгум витн патис. Мӱн Григорий-мӱнтыл тыт Ягримт ӱлымӱн.

– Хӱт ханищтахтасын? Хӱт рӱпитӱгын?

– Школа ӱстламум юи-

пӱлт Ханты-Мансийск ӱст педучилищат нила тӱл ханищтахтасум. Педучилище ӱстламум юи-пӱлт ювле ӱхтысум, садикт рӱпитаӱкв патсум. 2000 – 2007 тӱлыт Санкт-Петербург ӱсн Герцен наппа институтн ханищтахтӱкв ялантасум, «Культурология ос учитель родного языка и литературы» факультет ӱстласум. Мӱнӱщи

тыртасум. 26 тӱл садикт рӱпитасум, стажум тӱвлыс – ань ат рӱпитӱгум. Юн ӱлӱгум, матыр вӱрӱгум, юн ӱс рӱпата тӱвылхаты. Рӱщ лӱвнӱ щирыл «Древо жизни» хассум. Рӱтанум пӱссын ӱл-хассанум. Щащӱквамныл Ульяна Петровнамыл ӱвылтахты. Опа в репрессировайтавес, хуритӱ ос ат хультыс.



лӱатыӱ торгамтӱгум, мощну в потыртӱгум, сак хартӱгум. Садикт рӱпитаумут «национальный кружок» вӱрыгласум, мӱнӱщи ӱлнӱ вӱрмалъ нӱврамытн ханищтасум, мӱйтыт, ӱнгыт, ӱнгынутыт, ӱйхул ос мӱ-виту в урыл по-

Тамле потыр Зоя Алексеевна такви урӱтыл потыртас. Ты потрумӱн мӱн мӱлты тӱл ӱл-хансысламӱн, ань Зоя Алексеевна детско-юношеский Центр-колт рӱпиты, нӱврамыт мӱнӱщи лӱтӱыл ханищты ос сак хартнӱ вӱрмалъ суссылты. Ты кӱркам, нӱмса, сымыӱ хӱтпан ам паща лӱатыӱ кӱтӱгум. Пустӱгыл вос ӱлы, сӱтыӱыг, шуниӱыг вос ӱлы.

ӱвыл хурит З. А. Мелентьева Санкт-Петербург ӱст мӱнӱщи лӱатыӱ экзамен миме порат пӱслыма. Китыт хурит тӱв яблоня йив пӱхыт лӱоли. ӱлы хурит аквӱт ханищтахтам нӱт: Н. К. Маслова, З. А. Мелентьева, Н. К. Тасманова, Е. И. Адина.

Анна АЛГАДЬЕВА



Сав пормас атсыт

Нижневартовскан ялмум порат ам Лариса Хайрулина, музейт рупитан нэ, ёт вайхатасум. Мён руц махум музей-колт акван-хонтхатсумён ос тав рупататэ овылтыт анумен потыртас. Тан усанылт краеведческий музей олы. Яныг таквс этпос овыл хоталэт та кол 40 талэ төвлы. Лариса Алтафова лавыс:

- Мот музейт пуссын ётыл вэрвёсыт. Ос ты краеведческий музей Т.Д. Шуваев намыл пиным олы. Ты ойка тав тамле кол щёпитаңкве номылматас. Тимофей Дмитриевич 1970 талытыт история урокыт няврамытн хаништас.

Лүймән олуңкве ёхтумёт, ты ма овылтыт моща вас. Тувыл сосаң махмытыл ос тан олупсал пумша-лахтуңкве патыс, так-ви сосаң махум палт ялантас, тан ётаныл румалахтас.

Ханты ос ёрн махум, тан щёлың мананыл урыл няврамытн потыртас. Ос тувыл тотум пормасыт агитын-пыгытын суссылтас. Школанылт акв колнак вэрсыт, пормасыт тув атуңкве патсаныл.

Ётыл Тимофей Шуваев үст музей вэруңкве номылматас. Тав акван-атум пормасанэ ань

пуссын мән фондувт олэгыт. Тыи яныгш Нижневартовский районт олнэ хантыт ос ёрныттан пормасаныл. Тан хоты маныл, хотютн ос хунь тотвёсыт – мән пуссын нэпакн хассанүв.

Ты коньпал Тимофей Дмитриевич махумныл



савсыр потрыт хансыс. Ань научный рупата элаль хаснэв порат, тан сака эрмыглалэгыт. Тувыл Юрий Вэлла му-

зейн минэ магыс акв сүмъях хонтыс. Тыи Сардаковыт щёмъя тан сүмъяханыл тыг тот-вес. Ойка ванэтэ щирыл ёрнкол түштүңкве ос нётыс, хумус эри хултыглас.

2010 талт краеведческий колув ёмшакв хот-щёпитан магыс лап-пантвес. Музеюв онтолов накла лютит яныг колт шар ёлы накёт олы, тот яныг колнакыт оньщев. Тан щёпитаңкве овылтальвёсыт кос, ту-выл най кёрквалгыт ос кёртурыт мот щирыл

мощ вэруңкве эрсыт. Ань тамле колыт пуссын ищхипың утыл ёвтавет, кумыскаң авил вэравет ос сав лампочкал тагатавет. Таимэгыс олн сав эрмыглас, рупата хосан ёл-пюлтальвес. Тув тастыглым олнытат төвылхатсыт, ос йиль-пииг ловиньтавёсыт. Ётыл олн уш тув тастысыт. Ань яныг таквс этпос мус щёпитаңкве вёрмияныл ке, такем ёмас олнүв.

Мән тыт тэла тал ос ат үнлантэв. Ты колув «музей истории русской избы» руц щирыл лававе. Тав краеведческий музейов

нупыл ловиньтахты. Тыг сав маныл мүй махум ёхталэгыт, хаништан няврамыт тыг тотыглавет. Манки ос школытын, культура колытын ялантэв, тот суссылтапыт вэрыглэв.

Тувылищхипың утыл рупитаңкв хаснэ магыс хаништавёв. Ханты-Мансийскан овлэт «Мә-вит ос элумхолас» ос ётыл «Мә-вөй ос газ» накла музейгн хаништахтуңкве вөвиньтальвесүв.

Округт культура проектыт мән ос щёпитэв ос вуянтыанүв. Мән ётув рупитан нэ Ирина Иго-нина олныл майлувес, ос тав «Лук. Облас. Берёсто» нэпак щёпитас ос таратас. Нэпакёт ваховский хантыт хумус нялыт, маньхапыт вэрёгыт ос сас ёт хумус рупитаңкве хасэгыт – пуссын тув хасвёсыт.

Ты хаснэ вэрмаяныл Г.М. Дмитриев-Садони-ковын 1920 талт хасвёсыт ос хурин пёслувёсыт. Ирина Влади-мировна ты потрыт ос хурит Тобольский музейт хонтсанэ ос тувыл тахалыт нэпак таратас.

Ань ос «Исчезнувшие технологии ваховских ханты» мот проект щёпитасүв. Тот «чип» ос «сарга» та махумн ванэ пёс накыг урыл потрыт хансуңкве таңхёв. Ань музейный фондувт маныр пормасыт оньщев, пуссын нэпакн хансыанүв.

Ты хотал мус пёс пораныл акван-атнэ маснуетыт, пормасыт, ма ёлы-палт хонтым пёс утыт, савсыр хурит, до-кументыт оньщев. Пуссын аквёет 600 сётыра савит пормас атхатас.



Ты 1912 талт вэрим хури «Лук. Облас. Берёсто.» нэпакныл вислүв.

**Тамара
МЕРОВА**

Щисуп ойка

Хосат, хунь ащум мощ мәннугеғ олме
порат опамн потрыл потыртавес.
Свердловский область Ивдельский район
Кимың-щупа павыл олы. Тот ам самын пат-
сум. Пёс тот ам опагум-щашёквагум олсығ, Ти-
мофей Прокопьевич ос Анастасия Михайловна
Бахтияровығ. Павыл нёр ляпат олы, лов вёрыстат
Щисуп ойка ұнлы. Пёс опам лавыс, тот ат рёви
йтипалағ рёңхуңкв, кисгуңкв, тувыл мори
щисгуңкв - мёңквыт вағлэгыт.



Ащум тонт сáлы онышас, акв вáтихал нёрт олыс. Та юи-о́выл порат ащум сáлыяныл Тумп-яңкыт ўрсаныл, Щисуп ойка ляпат. Тонт ащум щáнюм уш нэгыг тотас-тэ. Тувыл юв ялантаңкв ляпанув олыс, щáнюм тонт нётуңкв эрыс, мán иң мánит олсўв.

Пёс ма́хум о́с кáса-щасыт воращлаңкв. Акв порат ащум лáви, опам сáлы ўрын ма́хманэн ты Щисуп ойка урыл потыр потыртас. Анямов Улякши ат агтыс, лáви: «Ам тай ань кон ты

ялапáлэгум, кисувлэгум, шар нэматыр тах áти!» Квáлапас, кон ёмантас, тувыл та кисувлас. Тонт акв ювле аквташир Щисуп ойканыл та щисувлас. Ма́хум пуссын хотьют олыс, сома пóлям витыл равтасавёсыт, суйтáл та патапасыт. Молях юв щалтапасыт. Та юи-пáлыт воссыг нэмхотьют ат воратас воращлаңкв.

Ётылнув ащум Улякшил Щисуп вáтат йтипáлаг ёмеғ, тавант, та порат вóт шар ат вóтыс. Ййвыт хотьют-

на сома нас хóилтавет, тэн юи-пáлэнт акваг та хосгавет, сома хотьют ат нáңкын яныг хóтпа юйит ёми. Щар ювле ат сунсым суйтáл сáлы ўрын ёрнколэн молях та ёмсығ.

Тахóльт ляпаннув патсығ, ат нáңкнэ матарен юит та хультыс. Тонт áртмын вáрмáль олыс, ляпат ёрнколэн олыс. Хóт хосат ке турманлавесығ, улпыл тонт та лапаяптувесығ.

Нас пилтвесығ. Пёс ат рóвыс тох паль пóх тамле потыр тáртаңкв, эрыс хóнтлаңкв, тувыл вáруңкв тох, хомус яныг хóтпат лáвёгыт. Ат рóви ке - ат рóви. Тамле сака воращлан ма́хмыт мёңквытн шар вóрн тотуңкв вёрмынувет. Наскáссыг хунь Щисуп наме тамле, улпыл шар пёс ма́хмыт ёмщакв вáсаныл ты вáрмáль, тувыл тóна та тох намт-саныл.

Мёңкв ва́глум потыр

Мария Тасманова потыртам потыр. Тав шар сáртын нýйт хум онышас, наме олыс Василий Миронович Самбиндалов. Тав пёс о́с сáлы ўрыс. Мариял акваг нёрт яласасығ, нýврам ат о́щсығ. Акв порат туи нёрт сáлы кинсым ёмсығ. Ва́гтал патсығ, ёл-ўнтсығ. Сунсэғ мувал, сáлыянен кос кинсэғ. Аквмат порат, хосат, нёр о́вылт матырсыр-мат сэмыл поталы нэ́глыс.



тыс. Мёңквэн та пёрумтахтас, самагён сунсым шар мóт ляльт тувыл та минас.

Та юи-пáлт воссыг нэмхуньт ат вáщинь-тастэн. Мария такви тамле вáрмáль ат вáнэ нэ, сака хот-рохтыс, лáви, сака пи́лыщмаң, хунь тамле мán ём-тэ́гын.

Нýйт ма́хум ёрыт олсыт, лóль матыр щеркит, сáй ут нэ́глы ке, тán вёрмысыт молях нýвлуңкв. Тán ёрт олсыт, пёс тэн-айнут тánаныл пилсыт.

Ань тамле э́лмхóлас áтим. Сáй утыт йти юн ёмуңкв патсыт, э́лм-хóласыт анькег акваг пилатáлуңкв патвёсыт, пилэгыт.

Ты хурит
Мария ТАСМАНОВА
пóслым олы.
Татьяна
БАХТИЯРОВА

Ващ́ка лáви: «Ул вóртóлн ойка. Хосат, ос аманур такем яныг?» Э́лалы сунсыглахтэ́г. Тон май та э́ртум лáвум вóртóлн ойкатэн акваг тэн палтылэн молях та ёми. Щар вóртóлн ойка хурип áти.

Яныг, пуның пота-лы э́лумхóлас хурип. Ващ́ка ань нýйт олыс. Нýйтн та ё́хтувес, ос воссыг нэматыр ат вёрмеғ вáруңкв, тох ке ты пувавёг. Потыртас, нýйтис, нýй-



Пёс пормасыт ёмщакв оныщавет

Яңк нәтнэ этпос нёлоловхуйплов щис-лат музеит янытлан мирхал хоталыг олы, таве 1978 тәл пәсныл янытлаве. Мән округт соссаң мир культура суссылтым сәв музеит рүпитэгыт. Тот сәвсыр маснutyт, ёсат, апат оныщавет ос хунь эри, выставкат вәрыглавет, пёс йис пормасыт мирн суссылтавет.

Мән мәныщи ос ханты пормасанув «Торум Маат» оныщавет ос тув тәл сыс 20 сөтыра хөтпа ёхталэгыт. Музейт рүпитан мәхум тәнти ялпың хоталаныл янытлан мәгсыл, пормасыт мүйлуптам хөтпат ос мөт мүй мәхум тув вөвиньтәлсаныл. Пормасыт коньпал З.С.

натэ хуньт ты музейн мүйлуптастэ. Тот ұльпа пөслым олы. Ләвыс, хунь ұльпат пөслы, акваг «Торум Маа» номтын ёхты. Сөль, картина тэ шар та мә хурипаг сусхаты.

Сәвсыр пормасыт мүйлуптам хөтпат музей кұчай нән В.Н. Кочетыгован нәтнэ



иг юнтуңкве таңхөгум, таймәгыс тыйм музейн мүйлуптылум. Амти мөтан юнтөгум, ты нуй тармыл юнтум хансам

сәв ёмас ләтңыл ләввес, сәвсыр мүйлупсатыл мүйлуптавес. Тит сәт щислаге мәгсыл атың тәнутың пасан вәрыглас, хұлың ос нёвлиң нәнил мәхум тыттувёсыт, щәил айтвёсыт.

Ань оlnэ төрмувт сыресәт ищхипың ут олы. Тох ты музей мәгсыл тамле лов ищхипың уткве ёвтвес, руц ләтңыл тән «аудиогид» ләвавет. Тув З.Н. Лозямова ос В.Ю. Кондин музей урыл потыртан экскурсиянән хансым оләгыт. Мүй хөтпа тамле утыл миве, тав музей янытыл ёмыгы, та ищхипың утэ тавән та потырты. Тув английский ләтңыл потыр ос хансым олы, мөт хон мәныл ёхтын мүй хөтпат ос аквта щирыл соссаң мәхум музейт ёмыгтаңкве патэгыт.

Ань йист тох та ёмтыс, мәныщи ос ханты пормасыт сәвыңпәлэ туп музейт кәсалаңкве вөрмиянүв. Тамле мәт рүпитан хөтпат культурав элал ялтуптан мәгсыл сака ёмас ос эрнэ тәла вәрөгыт. Тананыл мән ялпың хоталыл янытлыанүв, ос аквтох сымыңыщ элалэ вос рүпитэгыт.

**Галина
КОНДИНА**



Рябчикова ловиньтан нәпакыт тотыс. Тав ләвыс: «Ам хот-әти финно-угорский мирот оlnэ матын ялантасум, сәвсыр ёмас нәпакытыл мүйлуптавёсум, ань тәнаныл нән музейн мыганум. Кәсащан хөтпат тыг вос ёхталэгыт ос тыт тах ловиньтэгыт». Г.С. Райшев такви пөслум карти-

анытыл ос тынтәл экскурсиятын ялантан нәпак-лөмтытыл мүйлуптавёсыт, пүмашипа ләтңыл ләввесыт. М.К. Волдина нила сампа нуй тармыл юнтум Аяс ойка хансатэ ос ты музейн мистэ. Тав ләвыс: «Ты ам эргын ос ййквнэ ансамблюм мәгсыл юнтьглам нуюм. Ань таве оцнэм ват нупыл хұрум тәлыг ёмтыс. Йильпи-

мән хөт-әти яласым ёт-тотыгласлүв, ёранэ мощ хот-расмуңкве патсыт. Ам вәглум, тыт «Торум Маат» тав мұсхал щирыл оныщаве. Хунь нәврамытын, апганумн сунсыглаңкве тах патаве».

Мөтыт ёмас тәла тамле олыс: тот рүпитан учёный эква Е.А. Нёмысова 77 тәлэ төвлыс. Тав тот мәхмытын янытлавес,

Аги ты щёмьят эруптаве



Ты хурит Ольга Тимофеевна Чистякова ос Аня Дунаева пöслым öлэг. Тэнатэн ам Советский үст Ёринэква хөтал янытлан порат пöслысагум. Тэн тув Советский район Таёж-ный павылныл ёхталасыг.

Ольга Тимофеевна öйкатэнтыл кит пыг öнщег. Яныг пыгён Алексей колтаглэ ёт Югорск үст öлы. Ань ма-

вöй винэ мат рүпиты. Мань пыгён Павел ос нё-лолов классыт ханищ-тахты.

Ольга Тимофеевна так-

ви Советский район Тимкапавылныл öлы. Та павыл пöхыт тав ро-довой угодие öнщы. Маньши нэ лавыс, öлнэ матэ магсыл нэпаканэн сака хоса вәрсыг. Ань öйкатэ Сергей Павлович пенсият öлы, вöраим ос хул алыщдым акваг тот яласы.

Аня щаняге-ащаге ёт Тимкапавылт öлыс. Шко-лан минаме порат Со-ветский үсн интернатын кётвес. Тонт Ольга Тимо-феевна канке агирищкве такви палтэ вистэ. Аня Таёжный павыл школат ханищтахтуңкве патыс. Сымың нэкве ты урыл таи лавыс: «Ам амки яныгмам порам ёма-щакв номилум, мань павылквеныл яныг үсн интернатын öлуңкве кётвесүв. Интернатыт

öлым акваг юв вора-тасүв. Тыммагсыл кан-кум агирище Таёжный павылн амки палтум öлуңкве тотыслум».

Аня школат ханищ-тахтмёт үщлахтын по-рат щаняге-ащаге палт юв ялантас. Атятэ хунь атимыг ёмтыс, ома-тэ палт ныврам ат хуль-туптавес. Тонт Ольга Ти-мофеевна агирищакве нэпаканэ пуссын вәр-санэ, ань тав опеку-нхөтпаг ловиньтахты. Тэн öйкатэнтыл Аня тэнки ныврамаквён холът эру-птым янмалтытэн.

Ам ты колтагыл щёмья янытлан хөталыл яныт-лылум, пустагыл элаль вос öлэгыт. Сав сөт, сав щунь тананылн. Тöрумн, Отырн вос үргалавет.

**Людмила
АЛГАДЬЕВА**

Катыл пöслым ёмас хурит

Яңк нәтнэ этпос котилът Ханты-Мансийск үст В.А. Игошев намба музей-колт выставка вәрвес. Ты кол мань таквс этпос 2001 тәлт пүсвес, тонт В.А. Игошев, катыл хурит пöслум öйка, 80 тәлэ төвлыс.

Ань ты суссылтап Сочи үст вәрнэ яныг касыл 2014 тәл кастыл вәрвес. Вы-ставка öвылтан магсыл Россия ма янытыл катыл пöслын махум ёхтала-сыт. Тан халанылт Сер-гей Леонидович Под-версткий öлыс. Тав ма янытал сав мат яласас, ёмщаквег вәве.

Хум лавыс: «Ам хунь Ханты-Мансийск үсн ёхталаңкв вөввесум, ам-тирот номсэгум, лүимат

öлнэ мань үст маныр тот ану-мн пүмаш öлы. Хунь ам ёхтысум, нан үсын мот хон ма үс холът сыста-мыг сусхаты. Аквту-мат, сөль, хотты мот ман ёхтысум. Тыт öлмум сыс хұрум му-зеин ялсум. Тан ану-мн пуссын мұстысыт».

Потраныл ой-пам юи-пәлт хурит суссылтан вәрмалъ щар нуми кол-накыл öвылтавес. Öвлөт Владимир Александро-вич Москва үст öлме по-



рат юи-öвыл пöслум ху-риянэ суссылтавёсыт. Тот тав мот хон мат öлнэ мир пöслуманэ. Ёлы-

нув колнакт округувт öлме порат пöслум ху-риянэ суссылтавёсыт. Савыңпәлэ хуриянөт Няхшамвөль ос Сүевәт павыл маньши махманув пöслым öлсыт. Касың хуритөт янге-мане пус-сын танти щир пүмашиг тәлсыт. Хунь хосанув ху-риянэ нупыл сунсэгын, аквту-мат наң тот пöс-лым махмыт ёт вайхатым öлэгын.

Ёхталам махум пус-сын ёмас, сыстам ном-тыл тувыл сысы мина-сыт. Касың хөтпа тув ялуңкв вәрми. Эрың нан вәнэ махманьн тот кәсалыянын.

**Александр
ВЬЮТКИН**

**Луима сэрипос
(Северная заря)
№10 (1052), 24.05.2013**

Соучредители
Дума, Правительство
Ханты-Мансийского
автономного округа – Югры

Издатель
Департамент общественных
связей Ханты-Мансийского
автономного округа – Югры

Редакция

Главный редактор –
Решетникова Р.Г.
Телефон (3467)33-36-82

Заместитель главного
редактора – **Кондина Г.Р.**
Телефон (3467)33-22-72

Ответственный секретарь –
Узель В.В.
Телефон (3467)33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
kmns.admhmao.ru

Отпечатано:
ОАО «Издательский дом
«Новости Югры», г. Ханты-
Мансийск, ул. Мира, 46.

Подписано в печать:
по графику 22.05.2013 г.
в 16.00.; фактически
22.05.2013 г. в 16.00.
Индексы **04399, 54399**
Тираж **1750 экз.**
Заказ **1346**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.